



Ma voaltris, lu savêso ce che al è il cidinôr?

Sintisi bessôi, cence nissun ator, cence nissun rumôr, nissun che al fevele, nissune machine che a cor, a frene... No, se mi rispuindeis di sì, jo no us crôt.

Al è masse dificil cjatâ il cidinor, in dì di vuê. Ma une volte, cuant che o jeri frut, tai agns Sessante... o jeri lâ t a cjaminâ plancuç plancuç jù pe rive de Muzanele, viers il Cormôr, pôc fur des ultimis cjasis dal paîs... ah...alore sì che al pareve di podê scuvierzi ce che e jere la vere pâs. Si steve cussì ben e cussì cujets che no mi jeri nancje inacuart che tal fossâl innà de strade, scrufuiât te jerbe, cuntun vâs di veri in man, al jere Pieri Gjat, un dal paîs che lu clamavin cussì parcè che al veve dôs mostacjis lunghis e finis, come un pes barbon. Insome, cuant che mi veve viodût, chel mi veve fat subit moto di tasê, cuntun dêt denant dai lavris, e mi veve clamât dongje.

«Se tu stâs cidin e tu cjalis di chê bande là», mi veve dite segnant «tu rivis adore a viodi i pes che a svolin».

I pes che a svolin? mi jeri domandat scaturît, cjalant viers il flum. Va ben che o jeri frut, ma o jeri ancje un pescjadôr, e propit par chel, usât a contâle gruesse sul pes cjapât o scjampât, o jeri ancje usât a no crodi a dutis lis fufignis che mi contavin.

Ma ve li, propit in chel, e propit di chê bande che mi veve segnât, ve li, un pes svealâ adalt, fûr de Muzanele e vie par aiar, a dâi di code come un mat, par svealâ viers il cjamp di menighe. «Viodût» mi veve dite Pieri. «E cumò tiriti innà che o ai di cjapâ la cene di usgnot».

Ben po... Jo o jeri ancjemò instupidît dal pes che al jere svealât fûr de aghe, e no vevi fat câs a ce che chel mataran di Pieri al steve fasint tal fossâl. E no podevi crodi a miei voi cuant

che lu vevi viodût a cjapâ cuntun scat, un zupet grues come un dêt e a ficjâlu dentri tal vâs, dulà che al jere in spiete un biel trop di chês bestiis, verdis e sflandorosis sot il soreli di Lui. «Ma saressie chê li la to cene?» I vevi ciscicât cui voi scocolâts. E lui: «si capîs!» Ma jo, propite no capivi... Pes che a svualavin, int che a cenave cui zupets... ma dulà jerio? A Muzane o suntun altri mont?

«Anin, anin, che ti fâs viodi» mi veve dit alore Pieri, riduçant e saltant fûr.

In curt, dut il misteri si jere disvelât.

Su la rive de Muçanele, abàs, platât des frascjis e taponât tes canelis, al steve un colega di Pieri, ancje lui pescjadôr di vecje date. E il pes che o vevi viodût svualâ te menighe al jere un scuâl, ma mica piçul, un scuâl di passe un chilo. Chei doi a vevin metût adun un sisteme di pescje fenomenâl: A vevin taiât una rame di vencjâr, cjolte li dongje, peade une cuardute e insomp un am grês dulà che a tacavin, pene impirât pe schene, il zupet. Il scuâl a vês di savê che al è un pes une vore, ma une vore scaltri e malfident. E alore, chescj doi ce ti fasevino? Pene che il scuâl a saltave fûr e al gloteve la cavalete, prime che si inacuarzès dal am, lu tiravin fûr di bot, fasintlu svualâ fin tal cjamp.

Di chê volte, ancje se no soi plui un frut, mi plâs simpri contâ a miei amîs pescjadôrs che a Muçane, i pes... a svolin!

di Raffaele Serafini

Conte dal Ostîr,

su ispirazion dal libri di Adelmo Della Bianca,

“Scais e liscjis”

Par condividi:

Facebook

WhatsApp

Telegram

Print

Email